

Perpustakaan Digital pupuk minat membaca

Oleh **MOHAMAD SHOFI MAT ISA**

penarang@utusan.com.my

■ **KUANTAN 15 NOV.**

UNIVERSITI Malaysia Pahang (UMP) melancarkan Perpustakaan Digital bagi menggalakkan dan memupuk minat membaca serta menambah ilmu pengetahuan dalam kalangan warga universiti itu dan masyarakat setempat.

Naib Canselor UMP, Prof. Datuk Ts. Dr. Daing Nasir Ibrahim berkata, inisiatif itu sewajarnya dilihat sebagai satu respons strategik UMP terhadap realiti baharu global yang dicorakkan oleh transformasi landskap telekomunikasi dan internet saling berhubung atau *Internet of Things* (IoT).

“Kewujudan Perpustakaan Digital ini dapat meningkatkan capaian koleksi perpustakaan bagi manfaat warga kerja dan mahasiswa UMP, khususnya akses mereka terhadap bahan-bahan rujukan yang berkualiti dan berautoriti dalam format dalam talian.

“Perpustakaan Digital ini juga sebagai satu inisiatif teknologikal yang inovatif bagi maksud pengembangan peranan Perpustakaan UMP secara lebih strategik dan kontemporari sekali gus mengekalkannya sebagai sebuah pusat rujukan yang dinamik, komprehensif dan inklusif,” katanya di sini.

Majlis perasmian itu disempurnakan beliau di Auditorium Perpustakaan UMP Pekan baru-baru ini.

Yang turut hadir, Timbalan Naib Canselor (Akademik dan Antarabangsa) UMP, Prof. Datuk Ts. Dr. Rosli Mohd. Yunus; Timbalan Naib Canselor (Penyelidikan dan Inovasi) UMP, Prof. Datuk Dr. Mashitah Mohd. Yusoff; Timbalan Naib Canselor (Jabatan Hal Ehwal Pelajar dan Alumni) universiti itu, Prof. Datuk Dr. Yuserrie Zainuddin; Ketua Pegawai Operasinya, Abd. Hamid Majid; Ketua Pegawai Kewangan UMP, Zainuddin Othman; Penasihat Undang-undang UMP, Datin Wan Maizurina Wan Othman serta Timbalan Ketua Pustakawan UMP, Kamariah Gono.

Majlis itu disertakan dengan tayangan video montaj, demonstrasi mengakses sumber digital, pameran herba untuk kesihatan dan kecantikan serta pokok hiasan.



DAING NASIR IBRAHIM (duduk) mendengar penerangan daripada **Muhammad Fawwaz Abdul Rasid** (kanan) di Perpustakaan Universiti Malaysia Pahang, Kuantan, semalam.